



Supervizor Gregorian uskladio fakultativnu nastavu vjeronauka u javnim školama Distrikta Brčko sa vjerskim slobodama i državnim obvezama

Supervizor za Brčko dr Raffi Gregorian danas je izdao Nalog supervizora kojim se regulira održavanje nastave vjeronauka i radni status vjeroučitelja u javnim školama Distrikta Brčko, sukladno vjerskim slobodama i obvezama na državnom nivou.

Nalogom se podsjeća da je Bosna i Hercegovina sekularna država sastavljena od tri konstitutivna naroda i ostalih, te da Ustav garantira slobodu misli, savjesti i vjere kao osnovna prava, ali se njime ne utvrđuje nijedna zvanična vjera ili vjere Bosne i Hercegovine.

Nalogom se priznaju ugovori koje je Bosna i Hercegovina zaključila sa Svetom Stolicom i Srpskom pravoslavnom crkvom. Supervizor je mišljenja da bi se u odsustvu sličnog ugovora sa Islamskom zajednicom, odredbe ovih ugovora koje se odnose na obrazovanje trebale po analogiji odnositi i na vjeroučitelje i nastavu islamskog vjeronauka u Distriktu Brčko.

Supervizor Gregorian je izrazio zahvalnost liderima triju najvećih vjerskih grupa u Distriktu Brčko što su mu u više navrata, pismeno i usmeno, skrenuli pažnju na potrebu da se preciznije definira status vjeroučitelja i vjeronauka u javnim školama Distrikta, te da bi to definiranje trebalo da dovede do poboljšanja u održavanju fakultativne nastave vjeronauka.

Sukladno njegovom nalogu, vjeroučitelji će ubuduće moći da dobiju ugovore na neodređeno vrijeme i imat će isti status, prava i obveze, uključujući i obveze u pogledu stručne spreme, kao i bilo koji drugi nastavnik sukladno zakonima Distrikta Brčko.

Supervizor Gregorian je izrazio uvjerenje da su vjerske zajednice i vjeroučitelji posvećeni promidžbi i njegovanju multietničkog karaktera Distrikta, te da su svjesni svoje odgovornosti da nauče učenike da prihvate i poštuju sve vjere i one koji ne praktikuju ili se ne pridržavaju vjerskih običaja u duhu tolerancije i pomirenja.

Ipak, Supervizor je izrazio zabrinutost zbog opće tendencije koja se pojavila u Bosni i Hercegovini, a pogotovo u Distriktu Brčko, prema kojoj su sati vjeronauka, koji se nude kao fakultativan predmet u javnim školama, iz više razloga u sve većoj mjeri poprimili karakter obveznog predmeta, što se može primjetiti po skoro stopostotnoj stopi pohađanja takve fakultativne nastave u javnim školama Distrikta Brčko.

Osim toga, obezbjeđivanjem novca poreznih obveznika i obezbjeđivanjem prostorija javnih škola Distrikta bez plaćanja naknade u svrhu održavanja nastave vjeronauka samo za određene vjerske grupe, načinom na koji se trenutno održava nastava vjeronauka rizikuje se da se tim određenim vjerskim grupama pridaju obilježja zvaničnih vjera, čime se druge vjerske grupe ili oni koji ne praktikuju ili se ne pridržavaju vjerskih običaja isključuju i nanosi im se šteta na način koji se može smatrati diskriminatorskim, te se kao takav može zakonski i ustavno osporiti i dovesti u pitanje slobodu vjeroispovijesti i savjesti u Distriktu Brčko.

“Trenutačni način održavanja nastave vjeronauka ne smije stvoriti financijsku i političku zavisnost između vlasti i određenih vjerskih grupa što potom može da dovede do mogućeg podređenog položaja jednih u odnosu na druge što je na štetu i jednih i drugih,” rekao je supervizor.

Stoga, Nalogom se naglašava da će se nastava vjeronauka u školama i dalje odvijati na dobrovoljnoj osnovi i prema slobodnoj volji roditelja ili zakonskih staratelja učenika i podstiče uvođenje odgovarajućih sekularnih predmeta kao izborna alternativa fakultativnoj nastavi vjeronauke.